

# 寒星照孤影

林央敏

古早人講：「未食五月粽，破裘吓甘放」，一點仔都無吓著，雖然年已經過真久矣，穿一領綠羅裙的春天嘛歇置樹尾溜塊笑囉，但是北大荒的寒流吓願放阮煞，三不五時亦會侵入南方地。

對開始驚寒的我來講，這個帶寒氣的暗暝實在冷甲有淡薄仔過份，這若是踮異鄉做異客，一般的我會勾滯厝內，嗎過轉來故鄉、轉來這塊親切摺熟似嘛漸漸生疏去的土地，我吓願錯失每一個會凍吸收故鄉情的時刻，就是講冷霜霜的盈暗時，我亦欲把握。所以這陣，雖然更深夜靜囉，我吓踏置阮兜的門口埕。

北風陣陣透，夜蟲吱吱哭。雖然駛車趕一日的路，但是我感覺一旦到厝，規身軀的忝意叨會流入故鄉的土跤。

天抑未光，煞有一兩隻急性的雞角仔塊叫，我發覺這個暗暝昧喏暗，所以夯頭一看，看著這片天色竟然是天星粲耀耀，嬌、真嬌的夜空。這款暗暝，在我抑未出外流浪以前，清再浮置我的頭殼頂，但是幾年來若像離我真遙遠，這陣給倒想起來，我有一段長長的日子味記得體會繁星閃爍的夜色囉。

於是呢，我開始頭儻儻(daN)，目睷相懸懸，親像欲用這兩道目光助身軀懸吊踮半空中，向天長徘徊.....

寒天的夜星和熱天比起來，較朗較疏，感覺起來恁掛甲真懸真遠，像塊閃避半空中的寒流，嗎過北風吹，寒草衰，高高在上的星影猶原痞痞搖，若像孤單踏置土跤的我呢，雖然冷，嘛吓願匿入去暝。

頭殼內所貯的星圖攏是熟人的，因為隊罔仔時陣起，我攏置熟人好天的暗暝觀星望斗，所以我感覺這幅寒天的星影有一些仔散亂佻生份，一時想欲像古早仙人步光踏斗的彼種飄撇的心誠嘛飛味得起來，干單看著彼面萬里明鏡欲似流入無邊，阿千曲寒星也置慢慢飛起哩，但是煞無半粒過去熟似的星座互我認出來，我只好沿著星劍光芒的射向，一粒一粒、一簇一簇塊走揣，終其尾置一個印相之外的所在認出北斗七星，其他像太乙、牛女參小熊.....，攏吓知搬徙對佗去矣，無定恁嘛驚寒，叨親像年近四十的我，青春不再？或者是殘光癱弱，無力突破寒夜之暗啦？

星移斗轉，記憶中的北斗星，伊的斗柄總是映南，假是永過我迭迭置夏天的暗夜神遊星渚所得著的印相，嘛今夜斗柄舉東，這是我頭一擺看著。給想起來，星會震動，會催趕歲月，互時間老去。大起先我知影斗柄的方位佻季節有關係，是讀著劉鶚的《老殘遊記》，伊置遊記內塊想講：「歲月如流，眼見斗杓又將東指了，人又要添一歲了」，這表示將欲過年，春天已經在眼前，阿今夜年過矣，春天也轉來我的故鄉囉，只是寒流抑摺誠冷，特別是這個四邊恬恬沉沉，只有寒星閃爍的時陣。

佻天星對看，攏遙想王勃跔上滕王閣彼時的感慨：「物換星移幾度秋」，推算

起來，位我第一擺讀著斗柄將欲向東，到今仔第一擺看著斗柄正正向東，期間至少離了廿二個秋冬，阿我，嘛已經隊一個愛看星羅棋局的少年，恂恂老做一個面頂有星斑溝痕的中年人，但是跤手煞像進入年老安呢，將欲失去縛雞之力，踞今仔回想前塵往事，最使人感傷兮是年輕的理想猶原渺渺如雲漢，啊！無定蒼天欲罰我今生今世攏愛耽憂掛愁！

雖然功名無半寸，但是踞這個孤影對寒星的冷夜裡，沉思自省，好得幸我抑會凍保持一粒昧欣羨榮華富貴、昧慕想宦途名份的心，而且這對會凍做到邈視權勢官位的目矚嘛抑擱保持清明，使我會駛繼續瞋看遠遠的一粒星，著！大約二十年前，我讀過一篇好參像叫做〈LOOKING AT THE STAR〉的文章，彼位已經昧記得姓名的作者塊講，咱人得愛斟酌看遙遠的一粒星，安呢會互人堅信理念、堅持理想，昧互世俗迷去，也昧為俗世的功祿領頭捋腰煞咧忍辱吞聲、煞咧乞求賞賜。因為高遠的天星不染浮世半點塵埃，伊是理想的所在，看伊，叨恰若看著家己的理想。這陣想起這篇文章，忽然感受著這份清汽的意志抑會通互我感覺自慰。古早人謝靈運所講兮無吓著，「結念屬霄漢，孤影莫與諼」，只要高潔的星昧死，我叨昧忘懷自己的信念。

寒夜看星，心境同星境，攏分外清明，彼片寒渚中一粒一粒沈珠交結，三五成灘，四六成集，結做桂花樣。此時吓知有孰，宛也是寒宵獨影，伊，無鑽石、無寶珠、無金玉，嗎參我公傢著這片美麗的星澤，噫！天地悠悠，無定，只有庄外傳來吱吱唧唧的幾隻寒蟲。

此時此刻，規個庄頭攏靜悄悄暝落眠囉，拄才彼幾隻覺是天光矣的雞角仔嘛擱暝甲恬寂寂矣，星光下，冷風吹，輕輕搖動我的衫仔襟，可是搖昧震動兮是我的孤影。

----1993.03.08 作。發表置 1993 年「台灣文藝」；轉刊置 1993.12「蕃薯詩刊」第五集。中譯版發表置 1993 年聯合報副刊。